


蜀鑑

第壹冊

汲古閣藏本

蜀



此汲古閣所藏宋本曾經宋牧仲中丞鑒賞者雖書中閒有
永豕之譌而板式古雅紙質瑩潔信宋槧之佳者中遇宋諱
多改用空字如貞之作正剗避嫌名亦有不避者宋刺多不
畫一不且恠也又攷是書明時曾入內府故与尾誌以別璽曰廣
運之寶云道光二十四年太歲在甲辰十二月廿六日海虞翁同書
志於京師延旺廟街邱舍



是日又得明陸師道手鈔畫鑒一冊祖康并志



有人持石谷子臨李伯時龍眠山莊圖求售者絹素雖已微損神采猶奕奕
動人時逼歲除無以應乃卷還之與曝書亭集中記黃雀山樵畫一則
風味甚相似

蜀鑑序



蜀在禹貢一梁州爾文王興於岐
西而從武王牧野之師者乃庸蜀
羌髳微盧彭濮人說者謂文王化
行江漢之所被信矣三代以來秦
得蜀以并諸侯漢高由蜀漢以定
三秦諸葛孔明三分天下僅有其

一而伸大義於季漢非以其地西
接崑函南連荆吳扼關河之勝則
為右府之固合吾蜀之長則據上
流之重險要雖控制一隅而形勝
實關於天下歟

中興南渡首吳尾蜀有常山之勢
前褒後劔得金城之險乃眷西顧

護蜀如頭目保蜀如元氣世歷百
年歲經三卯外有虎噬之虞內懷
頽勞之憂而蜀之為蜀非全盛時
比矣文子久仕於蜀身履目擊而
動心焉燕居深念細繹前聞因俾
資中郭允蹈緝為一編起自秦取
南鄭迄于王師平孟昶凡地形之

阨塞山川之險阻邇雍而隣荆者
稽之舊史按之圖志悉紀于篇西
南夷為蜀後戶未形之憂難忽而
已事之鑒可師則又條其本末而
附之間又論其得失之要者定為
十卷凡千三百年蜀事之大凡亦
可以概見於此噫蜀在宇內九之

一爾得之則安失之則危竊之則
亾覽是書者可以鑒焉因名曰蜀
鑑云端平三年十月朔旦昭武李
文子序



蜀鑑卷第一

秦人取南鄭

秦厲公二十六年秦左庶長城南鄭


秦躁公二年南鄭反

秦惠公十三年秦伐蜀取南鄭

南鄭本古褒國按鄠道元水經注云東

周之初鄭桓公死於犬戎其民南奔居

此因曰南鄭後為蜀所併至是秦始取



之

論曰常璩謂蜀以褒斜為前門則南鄭者蜀之扞蔽也南鄭既入秦七十二年而蜀遂亡唇亡齒寒也久矣後之經理蜀者可不鑒乎

秦人取蜀

秦惠文王初更九年司馬錯伐蜀滅之

常璩華陽國志曰蜀王封弟葭萌號苴

侯命其邑曰葭萌苴侯與巴王為好巴與蜀讐故蜀王怒伐苴侯苴侯奔巴求救於秦惠王方欲謀楚群臣議曰夫蜀西僻之國戎翟為鄰不如伐楚司馬錯曰蜀國富饒得其布帛金銀足給軍用水通於楚有巴之勁卒浮大舶舡以東向楚楚地可得得蜀則得楚楚亡則天下并矣秋秦張儀司馬錯從石牛道伐

蜀蜀王自於葭萌拒之敗績開明氏遂
亾凡王蜀十二世司馬錯等因取苴與
巴焉又戰國策曰司馬錯欲伐蜀張儀
曰不如伐韓王曰請聞其說對曰今夫
蜀西僻之國而戎狄之長也弊兵勞衆
不足以成名得其地不足以為利爭名
者於朝爭利者於市三川周室天下之
市朝也而願爭於戎狄去王業遠矣錯

曰不然富國者務廣其地強兵者務富
其民以秦攻蜀譬以狼逐羊也取其地
足以廣國得其財足以富民繕兵不傷
衆而彼已服矣故拔一國而天下不以
為暴利盡西海諸侯不以為貪是我一
舉而名實兩附也今攻韓劫天子惡名
也而未必利也不如伐蜀之完也惠王
曰善起兵伐蜀取之蜀既屬秦益強富

輕諸侯 葭萌在今利州石牛即今大安軍金牛鎮

秦惠文王十一年封子通國為蜀侯以陳壯為相置巴郡以張若為蜀國守移秦民萬家實之

秦惠文王十四年陳壯反殺蜀侯通國秦遣甘茂張儀司馬錯復伐蜀誅陳壯秦武王元年封子恽為蜀侯

秦昭襄王六年蜀侯恽反司馬錯定蜀封子綰為蜀王

秦昭襄王二十二年王誅蜀侯綰但置蜀守張若取筰及江南地

論曰秦人取蜀以王其親子弟三而卒皆殺之歷三十二年而始定其取之不亦難乎初置守張若而定黔中繼用李冰而始平水害蜀自是安寧而漢高帝

蜀鑑卷一
用之以取三秦其所係不亦重乎

秦人取漢中

秦惠文王十三年秦庶長章攻楚漢中取地六百里分巴蜀置漢中郡

秦孝公初楚自漢中南有巴黔之地孝公招戰士明功賞國以富強至是惠文王既取蜀遂乘勝取楚地六百里又分巴蜀置漢中焉

論曰按南鄭自南鄭漢中自漢中南鄭乃古褒國秦未得蜀以前先取之漢中乃今金洋均房等州六百里是也秦既得漢中乃分南鄭以隸之而置郡焉南鄭與漢中為一自此始春秋楚人秦人巴人臧庸即今金房兩州地西漢地理志漢中郡治西地今金州上庸郡是也漢中乃秦楚巴蜀必爭之地秦得之而

全據上流以謀楚矣

昭襄王十三年任鄙為漢中守

昭襄王二十年王之漢中

秦人自蜀伐楚

昭襄王二十七年司馬錯發隴西因蜀伐

楚黔中拔之

昭襄王三十年蜀守張若伐楚取巫郡及

黔南為黔中郡

華陽國志云錯率巴蜀眾十萬大舶舡

萬艘米六百萬斛浮江伐楚 巫郡在

今巫山縣及施州黔中郡即今涪黔鼎

澧諸郡皆黔中地

論曰秦併六國自得蜀始蓋與秦為怨

者楚也秦既取蜀取漢中又取黔中則

斷楚人之右臂而楚之勢孤矣劫質懷

王操縱予奪無不如意於是滅六雄而

漢鑑卷一
一天下豈偶然哉由得蜀故也

漢高帝由蜀漢定三秦

漢元年春正月沛公為漢王王巴蜀漢中
都南鄭

秦始皇分天下為三十六郡巴蜀漢中
居其三割南鄭以隸漢中漢因建都於
此

漢王欲攻項羽蕭何諫曰雖王漢中之

惡不猶愈於死乎語曰天漢其稱甚美
臣願大王王漢中養其民以致賢人收
用巴蜀還定三秦天下可圖也

漢王令張良厚遺項伯使盡請漢中地項
王許之

漢王從杜南入蝕中張良送至褒中良說
漢王燒絕棧道

杜南在今京兆府萬年縣古杜伯國也

蜀鑑卷一
七
蝕中入漢中道川谷褒宇記曰褒口在褒城縣北北口曰斜南口曰褒同為一谷自褒谷至鳳州界一百三十里始通斜谷斜口在鳳翔府郿縣谷中褒水所流穴山架木以行張良勸漢王燒絕棧道以備諸侯盜兵且示項羽無東意今地名石門

漢王至南鄭拜韓信為大將

諸將及士卒皆謳歌思東歸多道亡韓信亦去蕭何追之信說漢王還定三秦遂聽信計今興元南鄭縣米倉山有截賢嶺韓信廟武云蕭何追信於此漢王留蕭何收巴蜀租給軍糧食秋八月引兵從故道出襲雍章邯迎戰陳倉敗走止戰好時又敗走遂定雍地

華陽國志曰漢祖自漢中出三秦伐楚

蕭何發蜀漢米萬斛而給助軍糧又曰
巴郡有實民多居渝水左右天性勁勇
初為漢前鋒陷陣銳氣喜鬪帝善之曰
此武王伐紂之歌也令樂人習學之謂
之巴渝舞○故道在今鳳州兩當縣陳
倉在鳳翔府寶雞縣好時在鳳翔府天
興縣

論曰漢高帝留漢中未幾反其鋒以向
關中足跡雖未嘗至蜀然所漕者巴蜀
之軍糧陷陣者巴渝之勁勇由故道戰
陳倉定雍地而王業成矣孰謂由蜀出
師不可以取中原哉

公孫述盡有蜀地

漢更始元年公孫述自稱益州牧
述茂陵人王莽以為導江卒正治臨邛
南陽宗成等起兵徇漢中以應漢述遣

使迎成等選精兵迎擊殺之併其衆假漢使者自稱益州牧按王莽改蜀郡為導江太守為卒正

更始將李寶張忠徇蜀漢述遣其弟恢擊寶忠於綿竹大破之述自立為蜀王都

成都

光武建武元年述遣其將侯丹取南鄭南鄭人延岑反圍南鄭更始所立漢中

王嘉初擊敗之岑復反嘉兵敗走岑遂據漢中造兵武都為更始將李寶所破岑走天水述遂遣其將侯丹取南鄭嘉收散卒數萬人以李寶為相從武都南擊侯丹不利還軍河池下辨復與延岑連戰岑引北入散關至陳倉嘉追擊破之岑屯杜陵興赤眉將逢安戰大破之漢中王嘉亦與赤眉將廖湛戰於谷大

破之光武令鄧禹招嘉嘉因來歙請降
延岑自武關走南陽述遂有漢中地
武都今階州天水今秦州河池今鳳州
下辨今成州散關今大散關谷口在今
鳳翔府郿縣武關今商州南陽今登州
述遣其將任滿據扞關

李熊說述東拒扞關述遣滿從閬中下
江州據之○史記張儀說楚曰秦西有

巴蜀大舡下水而浮一日三百餘里不
至十日而拒扞關扞關驚則黔中巫郡
非王之有矣史記索隱以為扞關即魚
復江關今瞿唐關顏師古注輿地廣記
郡縣志皆仍其說惟後漢史注扞關在
今峽州巴山縣樂史寰宇記峽州長楊
縣有古扞關城存即巴山縣地此為得
之扞關實楚地史記稱楚肅王所築今

巫郡江關則乃屬巴地故張儀云拒扞
關則黔中巫郡非秦有拒抵也至若黔
中巫郡皆在楚扞關之外也蓋扞關乃
楚之扞關江關乃巴蜀之江關也述據
扞關則荆門虎牙在扞關之內皆其設
險之地豈肯先自隘而但守魚復之江
關哉故辨之以正地理之闕江州縣名
今重慶府閬中今閬州

述遣其將李育程烏屯陳倉馮異迎擊大
破之

述聚兵數十萬人積糧漢中遣李育程
烏將數萬衆出屯陳倉徇三輔馮異擊
走之育烏俱奔漢中 陳倉在鳳翔寶
雞縣

光武得隴望蜀

建武八年来歙伐隗囂拔略陽

隗囂據隴右歙將二千餘人襲略陽斬
守將金梁囂大驚曰何其神也帝聞得
略陽甚喜曰略陽囂所依阻心腹已壞
則制其支體易矣○略在今秦州隴城
縣

隗囂圍略陽公孫述遣將李育田弇助之
囂盡銳攻畧陽累月不能下

夏四月帝自征隗囂至高平河西竇融來

朝

高平今鎮戎軍高平寨古安定地

隗囂將妻子奔西城

西城今金州西城縣

吳漢岑彭圍西城耿弇蓋延圍上邽九月
乙卯車駕還宮

帝自上邽晨夜東馳賜岑彭等書曰兩
城若下便可將兵南擊蜀虜人苦不知

足既平隴復望蜀每一發兵頭項為白
岑彭擁谷水灌西城城未沒丈餘會王
元等將蜀救兵五千乘高卒至鼓譟大
呼曰百萬之衆方至漢軍大驚元等決
圍死戰遂得入城迎囂歸冀城冀城在
今秦州隴城縣上邽在今秦州

隗囂病死子純立

帝使來歙護諸將屯長安遂討隗純於天

水十月攻破之純降

歙上書曰公孫述以隴西天水為藩蔽
故得延命假息今二郡平蕩則述智計
窮矣

公孫述使王元拒河池來歙蓋延進攻大
破之遂克下辨

隗囂將王元降述述使拒河池歙與蓋
延等破之遂克下辨乘勝而進蜀人大

蜀鑑卷一
懼○河池今鳳州下辨今成州同谷縣
盜殺來歙

王元遣刺客殺歙歙以蓋延領其軍
岑彭吳漢由江道取蜀

建武五年岑彭自夷陵屯津鄉

田戎據夷陵岑彭攻拔之獲其衆萬餘
人戎亡入蜀述以戎為翼江王岑彭謀
伐蜀以夷川穀少水險難漕留馮駿軍

江州曰鴻軍夷陵李玄軍夷道自引兵
還屯津鄉當荊州要會喻告諸蠻夷降
者奏封其君長○夷陵今峽州夷陵縣
夷道今峽州宜都縣津鄉左氏傳曰楚
子大敗於津鄉後漢志云江陵有津鄉
寰宇記云津鄉故城在今江陵縣東渚
官即其地

建武六年公孫述使田戎出江關招其故

衆欲取荊州不克

江關漢地理志云江關都尉理魚復注
水經云白帝山北緣馬嶺接赤甲山南
北相去八十五丈東西七十丈東傍瀼
溪西南臨大江 瞰之眩目惟馬嶺小
差逶迤猶斬山為踞羊腸數轉然後得
上公孫述據蜀自以金承土運故號曰
白帝城寰宇記云赤甲城公孫述築不

生樹木土石悉赤如人袒臂故曰赤甲
與舊白帝城相連皆在縣北即江關之
要也在今夔州奉節縣

建武九年春述遣田戎下江關據荊門虎
牙

述遣其將田戎任滿程汎將數萬人下
江關擊破馮駿等軍遂拔巫及夷道夷
陵因據荊門虎牙橫江水起浮橋關樓

立攢柱以絕水道結營跨山以塞陸路
拒漢兵○荊州記云南荊門北虎牙二
山臨江楚之西塞鄴道元注水經云公
孫述依二山作浮橋拒漢師下有急灘
名虎牙灘郭璞江賦曰虎牙桀立以屹
峯荊門闔竦而盤礴淵九回以高騰溢
流雷响而電激寰宇記云虎牙山有石
壁其色黃間有白文亦有牙齒形夷陵

志云上有城下有十二碕有灘甚惡在
今峽州

建武十一年春岑彭破夷陵入江關上壘
江馮駿守江州

岑彭數攻田戎等不克帝遣吳漢率劉
隆等三將發荊州兵凡六萬餘人騎五
千匹與彭會荊門彭裝戰舡數十艘吳
漢以掉卒多費糧穀欲罷之彭以為蜀

兵盛不可遣上書言狀帝曰大司馬不
曉水戰荆門之事由公而已閏月彭募
攻浮橋先登者賞於是偏將軍魯奇應
募而前東風狂急奇舡逆流直衝浮橋
攢柱有反把鉤奇舡不得去奇等乘勢
殊死戰因飛炬焚之風怒火盛樓橋崩
燒彭悉軍順風並進所向無前蜀兵溺
死者數千人斬任滿擒程汎而田戎走

保江州彭率臧宮劉歆長驅入江關彭
到江州以其城固糧多難卒拔留馮駿
守之自引兵乘利直指墊江攻破平曲
收其米數十萬石吳漢留夷陵裝露橈
繼進 墊江即今合州平曲未詳然彭
旣指墊江從涪水上平曲則在今遂寧
潼川之境也

述使其將延岑呂鮪王元公孫恢拒廣漢

及資中又遣侯丹拒黃石

漢立廣漢郡資中今資州資陽縣乃中水經歷之地寰宇記云黃石在今涪州涪陵縣有橫石灘岑彭已上壑江則述拒廣漢以備涪水屯資中以備江陽又先遣侯丹率二萬人以拒黃石則遂拒於江州之先也

岑彭自壑江還江州沂都江叢擊侯丹大破之使臧宮拒延岑於涪水大破之彭遂進拔武陽

彭使臧宮將降卒五萬從涪水上平曲拒延岑自分兵浮江下還江州沂都江而上叢擊侯丹大破之因晨夜倍道兼行二千餘里徑拔武陽使精騎馳擊廣都去成都數十里勢若風雨所至皆奔散初述聞漢兵在平曲故遣大兵逆之

及彭至武陽統出延岑軍後蜀地震駭
述大驚以杖擊地曰是何神也延岑盛
兵於沅水臧宮以轉輸不繼降者欲散
畔會帝遣謁者將兵詣岑彭有馬七百
匹宮矯制取以自益晨夜進兵多張旗
幟登山鼓譟右步左騎挾舡而引呼聲
動山谷岑大震恐因縱擊大破之斬首
溺死者萬餘人延岑奔成都其衆悉降

自是降者以十萬數王元山舉衆降○後

漢志沅水當為沈水注水經云沈水自

廣漢郡入涪江今按中江縣有一水入

涪臧宮旋平綿竹必自中江水也

論曰延岑自廣漢入涪水以拒壑江州今合

而岑彭下壑江由江州復上都江拔武

陽武陽今彭山縣由今河州此蜀人所以為

神也史謂自都江倍道兼行二千里至

武陽蓋夸詞之誤矣

冬十月盜殺岑彭於武陽十有二月吳漢將三萬人沂江而上

述使刺客詐為亡奴降岑彭刺殺彭監軍鄭興領其營以俟吳漢至而授之

建武十二年春正月吳漢進拔廣都

吳漢破述餘黨於武陽帝詔漢直取廣都據其心腹漢乃進軍攻廣都拔之

秋七月馮駿拔江州獲田戎臧宮拔綿竹破涪城斬公孫恢

吳漢入成都述自殺誅延岑

論曰光武得隴望蜀其勢若易矣而功反難岑彭沂流討蜀其勢若難矣而功反易何耶以下辨河池皆武都之阨塞述能守之誠未易窺而瞿唐為蜀之天險述不之守而速恃荆門虎牙以為固

浮橋一燎而述之技窮矣然光武中興
復漢舊物述猶陸梁一隅斗絕之蜀此
其見與井蛙何異身死族滅非不幸也

蜀鑑卷第一終

